

# Say Bisukol Ya Unkabalab Ed Dika

**M**anuulop ed sakey ya ayaman ira di Gelegele, Andirit, Ampingilan tan Bisukol. Pian anggapoy maumli, nanaapagan day kimey ed abong.

“Siak so sankabalegan ed sikatayon apat, kanyan siak so mangiolo,” lastog nen Gelegele.

Anggapoy agawaan na taluran kaaro no agsay unonor.

“No sikay mangiolo sirin, sika so mananap na naakan tayo inaguwagew,” kanyaw nen Ampingilan ed Gelegele.

“Sarasarag ko itan, ayan kabaleg ko,” lastog ya ebat nen Gelegele.

Sinmublay natan ya nanpili na kimkimey ira may talura. Inmunan nansalita si Andirit.

“Siak la’y iganggan yon onla anggad iner. Katoy kakanaan na duaran payak ko.”

Nanbalikas met si Ampingilan.



“Siak so manbantay na abong. Ed sakit na ketket ko, anggapoy manggaway mauges ed sikatayo.”

Sampot ya nansalita si Bisukol.

“Siak balet so manluto tan manlinis.”

Kanyan aya so nankakasakeyan dan kimkimey ed inaguwagew.

Sakey ya agew, inmalis tan nananap si Gelegele na naakan da. Ed panlalangoy to, akanengneng na patang ya makakapoy.

“Baleg yan patang. Siguradon manliket ira may kaarok ed sira mi naani.” Alabas so ilalo ton naisempet to may patang.

Nen kuanton tekmelan so patang, atikel si Gelegele. Agto naimanon sakey ya patit may patang. Ginuyor na sakey ya toon manbabanwit may patit kaiba lay Gelegele. Insempet na too si

Gelegele tan sinira.

Agla akasempet si Gelegele. Naknarasan lara di Andirit, Ampingilan tan Bisukol.

“Maykayo ta tumbuken koy Gelegele,” inkuan nen Andirit.




Inmarap ed salming si Andirit tan medyo nambayag ed impangisulong to'y kurbata. Diad itetkyab to, alinggis to'y Bolasi ya unlalangoy ed ilog. Mangkiwit so bibil ton sangkanengneng ed danum. Say amta nen Andirit elekan to nen Bolasi so kurbata to.

"Agay la iyan Bolasi elekan to amo ya'y kurbatak," inkuanto.

Kaniyan sirin ineletan to lan ineletan so kurbata to angga'd atikel tan ag akaingas.

Ag met akasempet si Andirit. Diad eras nen Ampingilan tan Bisukol, tinumbok nen Ampingilan may duara ran kaaro. Angisulong na balkes pian aga nalikas so inyebeng na balambang to. Aga nanbayag, ineletan to ni so balkes pian ag manpalospos so pantalon to. Ed sobran elet, apaldua so laman nen Ampingilan tan naplag ed taew.

Maermen si Bisukol ta aga akasempet so talura to iran kaaro. Anggano matatayam, inanusan nen Bisukol sa kinmurong anggad ilog. Inpilalek ton makasegep ed atagey ya dika pano nabantagan to no iner so



kolaan da iramay talura ton kaaro.

“Gelegeleee! Andiriiiit! Ampingilaaaaan! Kolaaaaan yo laaaa?”

Kulyaot to diya, kulyaot to'd man, so ginawa nen Bisukol balet anggapoy ebat ya nangel to. Manlapu'd saman, no makanengneng na atagey ya dika, sesegepen to iya insan manlingaw. Maniilalo ni ya nanengneng to lamet ira may talora ton kakaaro.

